

**Ўзбекистон Республикаси Судьялар олий кенгаши ҳузуридаги
Судьялар олий мактабининг судьялик лавозимларига номзодларни
тайёрлаш курсига қабул қилиш тартиби тўғрисида
НИЗОМ**

1-боб. Умумий қоидалар

1. Ушбу Низом “Таълим тўғрисида”ги, “Судлар тўғрисида”ги Ўзбекистон Республикаси қонунларига, Ўзбекистон Республикаси Президентининг 2019 йил 6 январдаги “Судьялик лавозимларига талабгорларни тайёрлаш, судьялар ва судлар аппарати ходимларини қайта тайёрлаш, уларнинг малакасини ошириш тизимини тубдан такомиллаштириш чора-тадбирлари тўғрисида”ги ПҚ–4096-сон қарорига мувофиқ Ўзбекистон Республикаси Судьялар олий кенгаши (кейинги ўринларда Кенгаш деб юритилади) ҳузуридаги Судьялар олий мактаби (кейинги ўринларда Олий мактаб деб юритилади)нинг судьялик лавозимларига номзодларни тайёрлаш курси (кейинги ўринларда Тайёрлаш курси деб юритилади)га қабул қилиш тартибини белгилайди.

2. Тайёрлаш курсига қабул қилиш Кенгаш томонидан Ўзбекистон Республикаси Олий суди билан биргаликда белгиланадиган қабул квоталарига мувофиқ давлат грантлари асосида амалга оширилади.

3. Тайёрлаш курсига қабул барча учун тенг ҳуқуқлилиқ, ягона қабул қоидалари ва танлов асосида амалга оширилиб, кириш синовларида юқори балл тўплаган талабгорларнинг қабул қилиниш ҳуқуқи таъминланади.

4. Тайёрлаш курсига ўттиз тўрт ёшдан кичик бўлмаган, олий юридик маълумотга ва юридик ихтисослик бўйича камида етти йиллик иш стажига эга бўлган Ўзбекистон Республикаси фуқароси қабул қилинади.

5. Тайёрлаш курсида ўқиш учун қуйидаги шахслардан ҳужжатлар қабул қилинмайди:

- жиноят содир этганликда айбланаётган шахс;
- судланган ёки ўзига нисбатан жиноят иши реабилитация қилмайдиган асослар бўйича тугатилган шахс;
- хорижий давлат фуқаролигига эга бўлган ёки хорижий давлат ҳудудида доимий яшаш ҳуқуқини тасдиқловчи яшаш гувоҳномасига ёҳуд бошқа ҳужжатга эга бўлган шахс;
- суд томонидан муомалага лаёқатсиз ёки муомала лаёқати чекланган деб эътироф этилган шахс;
- психиатрия ёки наркология муассасаларида ҳисобда турган шахс;
- судьянинг ваколатларини амалга оширишга тўсқинлик қиладиган бошқа касалликка чалинган шахс.

6. Талабгорларни қабул қилиш қуйидаги суд ихтисосликлари бўйича амалга оширилади:

- фуқаролик ишлари бўйича;
- жиноят ишлари бўйича;
- иқтисодий;
- маъмурий.

7. Тайёрлаш курсида ўқиш муддати ҳар йили сентябрь ойидан бошланадиган бир ўқув йилини ташкил қилади.

8. Қабул комиссияси таркиби камида саккиз нафар аъзодан иборат таркибда шакллантирилади. Қабул комиссияси раиси, раис ўринбосари ва масъул котиби (кейинги ўринларда – масъул котиб деб аталади) Кенгаш раисининг буйруғи билан, қабул комиссиясининг қолган аъзолари эса Олий мактаб директорининг буйруғи билан камида беш нафар аъзодан иборат таркибда тайинланади. Қабул комиссиясининг ташкилий ишлари масъул котиб томонидан амалга оширилади.

2-боб. Хужжатларни қабул қилиш тартиби

9. Тайёрлаш курсига кириш синовлари бошланишидан бир ой аввал Қабул комиссияси тайёрлаш курсига қабул қилиш муддатлари, ихтисосликлар номлари ва ажратилган ўринлар ҳақидаги ахборотни Кенгаш, Олий суд, Олий мактабнинг веб сайтлари ва телеграм каналларида, бошқа оммавий ахборот воситаларида белгиланган тартибда эълон қилади.

10. Тайёрлаш курсига киришда талабгорлар Олий мактабга бевосита ёки унинг веб-сайти орқали (www.sudyalaroliymaktabi.uz; www.sudya.uz) электрон шаклда қуйидаги хужжатларни тақдим этадилар:

- тайёрлаш курси ихтисослиги номини кўрсатган ҳолда Олий мактаб директори номига ариза;
- талабгор томонидан шахсан тўлдирилган сўровнома ва таржимаи ҳол;
- Кенгаш томонидан белгиланган намунадаги шахсий варақа (объективка) ва яқин қариндошлари (*талабгор ва унинг турмуш ўртоғининг ота-онаси, ака-ука ва опа-сингиллари, шунингдек талабгорнинг фарзандлари*) тўғрисидаги маълумотнома, шу жумладан электрон шаклда;
- олий юридик маълумот тўғрисидаги диплом (*таълим йўналиши: юриспруденция; таълим шифри: 5240100*) ва унинг иловаси нусхалари;
- талабгорнинг паспорт ёки ID картаси нусхаси;
- меҳнат дафтарчаси нусхаси;
- 3.5 x 4.5 ҳажмдаги 6 дона рангли фотосурат;
- Ўзбекистон Республикаси Соғлиқни сақлаш вазирлиги томонидан тасдиқланган шаклдаги одил судловни амалга оширишга тўсқинлик қиладиган касалликлар ва жисмоний нуқсонлар йўқлиги ҳақидаги тиббий маълумотнома (086/I шакл);
- психиатрия ва наркология муассасаларида ҳисобда турмаслиги тўғрисида маълумотнома;

- хорижий давлат фуқаролигини олмаганлиги ёки хорижий давлат ҳудудида доимий яшаш ҳуқуқини тасдиқловчи яшаш гувоҳномасига ёхуд бошқа ҳужжатга эга эмаслиги тўғрисидаги тилхат;

– охирги уч йил давомида бажарган ишлари тўғрисида иш жойидан маълумот-тавсиянома;

– иш жойидан тавсиянома;

– талабгор ва унинг яқин қариндошларининг судланганлик ҳолати бўйича маълумотнома.

11. Талабгорлардан ҳужжатлар ҳар йили 15 апрелдан 15 майга қадар қабул қилинади.

12. Қабул комиссияси келиб тушган ҳужжатларни 3 кунлик муддатда талабгорнинг касбий, ишчанлик ва шахсий фазилатларини ўрганиш учун Кенгашга юборади.

3-боб. Кириш синовлари

13. Кириш синовларини ўтказиш тартиби Қабул комиссияси томонидан белгиланади.

14. Кириш синовлари давлат тилида ўтказилади. Қабул комиссиясининг қарорига асосан кириш синовлари бошқа тилларда ҳам ўтказилиши мумкин.

15. Кириш синовлари қоида тариқасида август ойида ўтказилади. Психологик тест Тайёрлаш курсига ҳужжат топширилганидан сўнг босқичма-босқич ўтказиб борилади.

16. Кириш синовлари уч босқичдан, яъни психологик тест, ихтисослик синовлари ҳамда оғзаки суҳбатдан иборат.

17. Психологик тест Кенгашнинг “Психологик тест” ахборот тизими базасида ташкил этилиб, натижаси психолог мутахассис томонидан баҳоланади. Психологик тест шахсизлантирилган ҳолда текширилади. Психологик тест натижаси “қоникарсиз” баҳоланган талабгорлар кейинги босқич синовларига қўйилмайди.

18. Психологик тестни ўтказиш тартиби Кенгашнинг 2021 йил 6 майдаги СОҚҚ-1543-III-сонли қарори билан тасдиқланган “Судьялик лавозимларига номзодлар ва судьяларнинг касбга муносиблигини баҳолашга кўмаклашувчи психологик тест тизими тўғрисида”ги Низом билан тартибга солинади.

19. Ихтисослик синовлари мутахассислик ва чет тили бўйича тестдан ҳамда ҳуқуқий мавзудаги иншо ёзишдан иборат. Ихтисослик синовларининг умумий баллари қуйидагилардан ташкил топади:

– мутахассислик бўйича тест 93 балл (30 та тест саволи бўйича 3,1 баллдан);

– чет тили бўйича тест 33 балл (30 та тест саволи бўйича 1,1 баллдан);

– ҳуқуқий мавзуда ёзма иш (иншо) 93 балл.

20. Миллий сертификат ёки халқаро сертификатнинг қуйидаги даражаларига эга бўлган талабгорларга чет тили фанидан синовларсиз максимал балл берилади:

– инглиз тили учун – миллий сертификат ёки International English Language Testing System (IELTS 5.5), Test of English as a Foreign Language (TOEFL IBT 72), Cambridge Assessment English FCE халқаро синов тизимлари бўйича тилни билиш даражалари B2 ва ундан юқори;

– немис тили учун – миллий сертификат ёки Goethe-Zertifikat, Deutsches Sprachdiplom (DSD), Test Deutsch als Fremdsprache (Test DAF) халқаро синов тизимлари бўйича тилни билиш даражалари B2 ва ундан юқори;

– француз тили учун – миллий сертификат ёки Diplôme d'Etudes en Langue Française (DELFF), Test de Connaissance du Français (TCF) халқаро синов тизимлари бўйича тилни билиш даражалари B2 ва ундан юқори;

– бошқа тиллар учун – миллий сертификат ёки халқаро синов тизимлари бўйича тилни билиш даражалари B2 ва ундан юқори.

21. Ихтисослик синовлари ихтисосликлар бўйича алоҳида ўтказилади. Ихтисослик синовлари талабгорнинг мутахассислик ва чет тиллари фанлари бўйича билим даражаси, таҳлилий, танқидий фикрлаш, ҳуқуқий манбалар билан мустақил ишлаш ҳамда ҳуқуқий масалалар бўйича хулосаларни баён этиш борасида қобилиятларини ва саводхонлик даражасини аниқлашга қаратилган.

22. Кириш синовларини ўтказиш учун Олий мактаб директорининг буйруғи билан ҳар бир ихтисослик фанлари бўйича алоҳида комиссиялар ташкил этилади.

23. Ихтисослик фанлари бўйича комиссия таркибига Олий мактабнинг профессор-ўқитувчилари киритилади. Шунингдек, заруриятга кўра, комиссия таркибига Кенгаш ва Олий суд судьялари, ходимлари, бошқа таълим муассасаларининг профессор-ўқитувчилари ҳам жалб этилиши мумкин.

24. Ихтисослик фанлари бўйича комиссия раислари зиммасига қуйидаги масъулият юкланади:

– синовлар сифатли ўтказилишини таъминлаш мақсадида комиссия таркибига малакали, талабчан ва адолатли профессор-ўқитувчиларни жалб этиш;

– комиссия аъзоларининг вазифаларини белгилаш (маслаҳатлар беришни ташкил этиш, синов саволларини тузиш, жавобларни баҳолаш мезонларини ишлаб чиқиш ва бошқалар);

– синов жараёнига раҳбарлик қилиш ва назорат этиш.

25. Ихтисослик бўйича синовларни ўтказиш тартиби (ўқитувчиларни аудиторияларга тақсимлаш, жавобларни шифрлаш ҳамда текшириш ва бошқалар) Қабул комиссияси томонидан белгиланади.

26. Давлат тест маркази томонидан тақдим этилган ихтисослик синовларининг натижалари баҳолаш мезонларига мувофиқ балл билан белгиланади ва қайдномаларга киритилади. Қайдномалар ихтисослик бўйича синов комиссиясининг аъзолари, қабул комиссиясининг масъул котиби томонидан имзоланади ва қабул комиссиясининг раисига тақдим этилади.

27. Ихтисослик синовларида максимал баллнинг ярмини тўплай олмаган талабгорлар кириш синовларининг суҳбат босқичига қўйилмайди.

28. Суҳбат ўтказиш Кенгаш, Ўзбекистон Республикаси Конституциявий суди, Олий суди, қўйи судлар, Судьялар ассоциацияси, Олий мактаб ва юридик олий таълим муассасалари вакилларида иборат таркибдаги махсус комиссия томонидан амалга оширилади. Комиссия таркиби ҳар бир ихтисослик бўйича камида тўққиз нафар аъзодан иборат бўлиб, учдан икки қисми ҳозир бўлганда ваколатли ҳисобланади. Суҳбат комиссияси раиси Кенгаш раиси томонидан тайинланади.

29. Суҳбат талабгорнинг суд-ҳуқуқ соҳасидаги ислохотларнинг мазмун-моҳиятидан, юриспруденцияга оид таълимотлар ва қоидалардан ҳамда ихтисосликка оид қонунчиликдан хабардорлигини, шунингдек унинг дунёқараши доирасини аниқлаш мақсадида ўтказилади.

30. Суҳбат натижасига кўра ҳар бир комиссия аъзоси томонидан талабгор 100 баллик тизим асосида баҳоланади ҳамда комиссия аъзоларининг сонига бўлган ҳолда, унинг ўртача балли ҳисоблаб чиқилади.

31. Қабул комиссияси талабгорнинг ихтисослик синовлари ва суҳбат натижасида тўплаган балларини қўшиб ҳисоблаган ҳолда энг юқори балл тўплаган талабгордан бошлаб камайиш тартибида қабул квотасида белгиланган сонгача Тайёрлаш курсига қабул қилинган тингловчилар рўйхатини шакллантиради.

32. Тайёрлаш курсига қабул қилинган талабгорларнинг синов ишлари уларнинг шахсий ҳужжатлар йиғма жилдларига тикиб қўйилади.

33. Ўқишга қабул қилинмаганларнинг синов ишлари 6 ой давомида сақланади, сўнг белгиланган тартибда йўқ қилинади.

34. Кириш синовларини қайта топширишга йўл қўйилмайди.

4-боб. Кириш синовларини ўтказиш тартиби

35. Кириш синовларини ушбу Низомга қатъий риоя қилган ҳолда ташкил этиш ва ўтказиш вазифаси Қабул комиссиясига юкланади.

36. Кириш синовларини ўтказиш жадвали Қабул комиссиясининг қарори билан тасдиқланади. Қарорга кириш синовларида иштирок этиш ҳуқуқига эга бўлган талабгорлар рўйхати илова қилинади.

37. Кириш синовлари ўтказиладиган фанлар дастури, қоида тариқасида, кириш синовлари бошланишидан бир ой олдин Олий мактаб веб-сайтига жойлаштирилади.

38. Кириш синовлари ўтказилишига қадар Қабул комиссияси томонидан синов фанлари бўйича маслаҳатлар ташкил этилади. Маслаҳатлар жадвали Қабул комиссияси томонидан ишлаб чиқилади ва қабул комиссияси раиси томонидан тасдиқланади.

39. Кириш синовлари ўтказиш жараёни видеотасвирга олинади. Видеотасвирдан нусха кўчириш тақиқланади.

40. Кириш синовлари ўтказиладиган бинода кириш синовлари материалларини тарқатиш ва йиғиб олиш учун синов вақтида ушбу материалларни сақлаш учун сейфлар билан жиҳозланган махсус хона тайёрланади.

41. Кириш синовлари ўтказиладиган бино ва аудиторияларда уларни ўтказиш учун санитария ва ёнғин хавфсизлиги қоидаларига тўлиқ жавоб берадиган зарур техник, тиббий ва маиший шароитлар яратилиши керак.

42. Ихтисослик синовлари Қабул комиссияси ёки унинг буюртмасига кўра Ўзбекистон Республикаси Вазирлар Маҳкамаси ҳузуридаги Давлат тест маркази томонидан ўтказилади.

43. Қабул комиссияси раиси томонидан тасдиқланган комиссия аъзолари ва Олий мактабнинг бошқа ходимлари аудиторияларга масъул (аудитория кузатувчиси) этиб жалб қилинади.

44. Ихтисослик синовларини очиқ ва шаффоф ўтказиш мақсадида қабул комиссиясининг қарорига асосан бошқа идоралар ва жамоатчилик вакиллари аудитория кузатувчилари сифатида жалб қилиниши мумкин.

45. Кириш синовларини ўтказиш жараёни тўғридан-тўғри намоиш этиб борилади.

46. Ихтисослик фанлари бўйича кириш синовлари саволлари ихтисосликлардан келиб чиқиб тузилади.

47. Тузиладиган саволларнинг сифати, мазмуни ҳамда уларнинг бошқаларга ошкор этилмаслиги бўйича масъулият Ихтисослик бўйича комиссия раиси ва аъзоларига юкланади.

48. Чет тилидан тест саволлари инглиз, немис ёки француз тилларида ёхуд Қабул комиссиясининг қарорига кўра, талабгорнинг хоҳишини инобатга олинган ҳолда бошқа тилда ҳам тузилиши мумкин. Чет тилидан тест саволлари Давлат тест маркази томонидан шакллантирилади.

49. Ихтисослик фанлари бўйича комиссия томонидан тузилган тест саволлари ва иншо мавзулари Қабул комиссияси аъзолари томонидан яширин овоз бериш йўли билан сайланадиган аъзога баённома билан бирга топширилади. Яширин овоз бериш йўли билан сайланган аъзо ҳақидаги маълумотни ошкор қилишга йўл қўйилмайди.

50. Талабгор қуйидаги ҳолларда имтиҳонларга киришга рухсат берилмайди:

имтиҳонга белгиланган вақтдан кеч қолган тақдирда;

имтиҳонга алкоголь ёки психотроп модда таъсирида келган ҳолларда;

тақиқланган ашёларни олиб киришни аниқлаш мақсадида ўтказиладиган текширувдан ўтишдан бўйин товлаганда.

51. Талабгорлар кириш синовлари топшириш учун белгиланган вақт ва жойга ўз шахсини тасдиқловчи ҳужжат билан келиши лозим. Синовда қатнашмаган талабгорлар учун қўшимча синов ўтказилмайди.

52. Кириш синовларини топшириш учун талабгорлар гуруҳларга бўлиниши мумкин.

53. Кириш синовлари ўтказиладиган аудиторияга қоғоз ёки электрон манбадаги ўқув адабиёти, луғат, маълумотнома, жадвал, конспект, ёзув дафтарлари, қоғоз ёки электрон шаклдаги шпаргалкалар, норматив-ҳуқуқий ҳужжатлар, алоқа воситалари, аудио, фото ва видео ёзиш қурилмаларини олиб кириш ҳамда улардан фойдаланиши, шунингдек синов жараёнида

талабгорларнинг тест саволлари ёки бошқа масалалар юзасидан ўзаро суҳбатлашиши тақиқланади.

54. Талабгорларнинг кириш синовлари давомида аудиториядан чиқиши тақиқланади. Соғлиғининг ёмонлашиши ва бошқа зарур ҳолатларда синов материалларини қолдириб, кузатув остида аудиториядан чиқишга рухсат берилади.

55. Кириш синовларини ўтказишнинг белгиланган тартибини бузган талабгор синовдан четлаштирилади. Бунда аудитория кузатувчилари томонидан далолатнома расмийлаштирилган ҳолда талабгорнинг тест синовлари ва ёзма ишлари баҳоланмайди ҳамда улар синовда иштирок этмаган ҳисобланади.

56. Аудитория кузатувчилари талабгорлар гувоҳлигида иншо мавзулари ёзилган билетлар солинган конвертлар муҳрланганига ишонч ҳосил қилгач, уларни очади.

57. Кузатувчилар иншо ёзиш учун мўлжалланган қатъий ҳисобда турувчи, рақамланиб муҳрланган дафтарларни тартиб билан тарқатади.

Бунда дафтарларнинг варақлари алмаштириш имконини истисно қиладиган тарзда Қабул комиссияси муҳри ва комиссия раисининг имзоси билан тасдиқланган бўлиши лозим.

58. Аудитория кузатувчилари талабгорларга дафтар муқовасида ўз фамилияси, исми, отасининг исмини кўрсатиши, дафтар варақларини букламаслик, фарқ қилувчи белгилар қўймаслик, ёзувлар тагига чизмаслик, жавобларни белгилашда кўк ҳаворанг шарикли ручкадан бошқа ручкадан фойдаланмаслик ҳақида тушунтириш бериши, шунингдек ушбу талабларни бузиш ёзма синов ўтказиш талабларини бузиш деб ҳисобланиши ҳақида уларни огоҳлантириши лозим.

59. Синов якунлангач, Қабул комиссияси раиси дафтарлар солинган қутиларни аудитория кузатувчиларидан қабул қилиб олади ва дафтарларнинг муқоваси ва биринчи варағига махсус шифрлар қўйиб, дафтар муқовасини йиртиб олади ва қўйилган шифрларнинг сир сақланиши учун шахсан жавоб беради.

60. Ёзма ишларни текшириш ва баҳолаш мақсадида синов якунланган заҳоти махсус комиссия ташкил этилади.

61. Махсус комиссия аъзолари томонидан ёзма ишларни текшириш ва баҳолаш учун ажратилган хонага уяли телефонлар, бошқа алоқа ва телекоммуникация воситаларини олиб кириш тақиқланади.

62. Махсус комиссия раиси дафтарлар солинган қутиларни Қабул комиссияси раисидан қабул қилиб олиб, махсус комиссия аъзолари иштирокида очади ва дафтарларнинг муқовалари ажратилганлиги ва шифрланганлигини текширади.

63. Муқоваси ажратилмаган, шифрланмаган ёки талабгорнинг шахсини аниқлаш имконини берувчи бошқа белгилари мавжуд бўлган дафтарлар аниқланган тақдирда, далолатнома тузилади. Бундай ишлар текширилмайди.

64. Ёзма иш натижалари тегишли шифрлар билан алоҳида қайдномага киритилади.

65. Дафтарлар ва ёзма иш натижалари қайдномаси кутиларга солинади ҳамда махсус комиссия раиси томонидан Қабул комиссияси раисига топширилади.

66. Психологик тест, тест синовлари (чет тилидан ташқари), ёзма иш (иншо) ҳамда суҳбат натижалари бўйича шикоятлар Олий мактаб расмий веб-сайтида эълон қилинган кундан эътиборан 24 соат давомида қабул қилинади. Судьялар олий мактабига кириш ва якунлаш имтиҳонлари натижаларидан норози бўлиб берган мурожаатларини кўриб чиқиш бўйича имтиҳон комиссияси (бундан буён матнда Апелляция комиссияси деб юритилади) шикоятларни 2 иш кунида кўриб чиқади.

67. Синов бўйича апелляция куни ва вақти ҳақида Олий мактаб расмий веб-сайтида эълон берилади ёки шикоят йўллаган талабгор хабардор қилинади.

68. Зарур ҳолларда, апелляцияни кўриб чиқиш жараёнига махсус комиссия аъзолари, аудитория кузатувчилари ва бошқа шахслар жалб қилиниши мумкин.

69. Шикоятни кўриб чиқиш натижасида Апелляция комиссияси томонидан қуйидаги қарорлардан бири қабул қилинади:

- кириш синов натижаларини ўзгаришсиз қолдириш ва шикоятни қаноатлантиришни рад этиш;
- талабгорнинг шикоятини қаноатлантириш.

Талабгорнинг шикояти қаноатлантирилган тақдирда, Апелляция комиссияси талабгорнинг синов ишига узил-кесил балл қўяди ва қабул қилинган якуний қарор ҳақида унга хабар беради.

Апелляция комиссияси қарори устидан Кенгашга шикоят қилиниши мумкин.

70. Қабул комиссияси томонидан талабгорларнинг тест синовлари, ёзма иш (иншо)дан ҳамда суҳбатдан олган баллари жамланиб, умумий қайдномада барча ихтисосликлар бўйича талабгорларнинг алоҳида рўйхати шакллантирилади.

71. Рўйхатда талабгорлар тўпланган энг юқори баллдан бошлаб камайиб бориш тартибида ўқишга қабул қилинганлар алоҳида-алоҳида жойлаштирилади.

72. Қабул комиссияси муайян ихтисосликка танловдан ўта олмаган ва энг юқори балл тўплаган талабгорни унинг розилиги билан квота ўринлари тўлмай қолган бошқа ихтисосликка ўтказишга ҳақли.

5-боб. Ўқишга қабул қилиш тартиби

73. Умумий қайднома асосида Қабул комиссияси томонидан талабгорларни тайёрлаш курсига қабул қилишга тавсия этиш тўғрисида баённома расмийлаштирилиб, Қабул комиссияси раиси томонидан тасдиқланади.

74. Олий мактаб директорининг Қабул комиссияси баённомасига асосан талабгорларни тайёрлаш курси тингловчилари сафига қабул қилиш ҳақидаги

буйруғи чиқарилади ва бу ҳақдаги маълумот дарҳол Олий мактабнинг веб-сайтига жойлаштирилади.

6-боб. Яқунловчи қоида

75. Мазкур Низомда белгиланган масалалар бўйича низолар қонунчилик ҳужжатларига мувофиқ ҳал қилинади.